

# Friehling iss!

Om letzde Mittwoch habb ich uff de Gass de Karl getroffe. Ei gude wie, sacht de Karl unn guckt mich so komisch oo, Honnes, bisde kronk? Du siehst garnit gut aus, iss was? Ich war werklich gut druff unn dann kann ich so e Frooch garnit leide, also saach ich: Ach Karl, ich habb schlecht geschloofe. Drei Mol bin ich heit Nacht wach worrn weil ich so komische Geräusche im Gadde geheert habb. Beim dritte Mol bin ich uffgestonne, gonz leise, um die Fraa nit ze wecke, habb merr de Bademondel oogezoche unn bin enaus uff die Terrass. Ess war kalt unn mich hotts geschuckert. Gonz weit weg hott e Eul gerufe, e onner hott von noch weider weg Antwort gewwe, awwer sunnst wars still, doodestill, unn trotzdem habb ich alls was geheert, gonz leise, so als wenn ooner zwaa Finger onnenonner reiwe det, so gonz zart. Ich wusst awwer nit wasses war unn habb die Aache zugemacht, um besser heern ze kenne – bis uff oomol ... mir iss gonz unheimlich worrn als ich gemerkt habb wasses iss, richdich unheimlich, mir isses gonz kalt de Buckel enunnergeloffe – bis uff oomol ...

De Karl iss erschrocke unn iss gonz blass worrn. Josses naa, Honnes, was war denn dess wassde doo geheert host?

Ich mach e gonz ernst Gesicht. Karl, komm emol e bisje näher, ich saach derrs ins Ohr.

Unn als de Karl mir de Kopp hiegehalle hott, habb ich geflistert: Karl, ich habb ...

No was dann, Honnes, flistert aach de Karl, so saach schunn.

Doo habb ich dief Luft gehollt unn dem Karl so ins Ohr gekrische, dass er enn Satz gemacht hott: Frieling iss. Ich habb dess Gras wachse heern!

De Karl guckt mich oo, unn ich denk, der iwverleecht jetzt ob er mich umbringe odder oofach fortgehe soll. Awwer nix, er hott nor e neugierisch Gesicht gemacht unn gefroocht: Kann ich dess aach emol heern bei dir? Dann komm ich heit owend, bring die Paula mett, die Mädcher könne e bisje babbele, unn mir zwaa drinke ooner unn später gehn merr dann enaus uff doi Terrass. Wolle merr dess mache?

Ich saach: Ei Karl, no klar, kommt heit owend zu uns unn dann heern mir zwaa uns oo, wie bei mir im Gadde dess Gras wachse dut.

Korz nooch acht kam de Karl unn die Paula, mir hawwe uns hiegesetzt, die Fraue hawwe Tee gedrunke, ich habb e gut Flasch Wickerer Woi gehollt, weil ich de Karl doch erschrocke hadd, die Flasch hawwe merr gepetzt, dann habb ich noch oo gehollt unn als merr die leer hadde sinn merr enaus uff die Terrass, hawwe die Dier hinner uns zugezoche unn hawwe gehorcht.

Widder hott die Eul gerufe, widder hott e onner Antwort gewwe, widder wars doodenooch doodestill unn widder war so ebbes in de Luft, wie als ob ooner soi Finger onnenonner reiwe det

Pst!, macht de Karl, pst! Ich denk ich waaß wasses iss. Frieling iss, awwers Gras isses nit.

Nit dess Gras?, habb ich leise gefroocht, ei was isses dann was mir doo heern?

Doo pischpert de Karl: Komm emol her, ich sach derrs ins Ohr. Unn als ich dem Karl moi Ohr hiegehalle habb, doo flistert de Karl: Honnes, dess iss nit dess Gras, dess iss ...

Ich war gonz gesponnt. Ei was isses dann, Karl?

De Karl hott dann so leise gebabbeld, dass ichs kaum heern konnt: Wasde heerst iss de Kalk der in doim Herrnkasde riesele dut. Gehn merr widder enoi. Hosde noch e Flasch von dem gute Wickere im Keller? Eiern Honnes